

Samþykkt fyrir ungmennaráð Ísafjarðarbæjar

1. gr.

Stofnun og tilgangur

Bæjarstjórn Ísafjarðarbæjar telur mikilvægt að íbúar bæjarins hafi sem mest áhrif á ákvarðanir sem snerta líf þeirra og afkomu. Í því skyni að gefa ungmennum bæjarins tækifæri til að láta rödd sína heyrast er stofnað til ungmennaráðs á grundvelli æskulýðslaga nr. 70/2007. Í 11. gr. laganna segir: „Sveitarstjórnir hlutast til um að stofnuð séu ungmennaráð. Hlutverk ungmennaráða er m.a. að vera sveitarstjórnnum til ráðgjafar um málefni ungs fólks í viðkomandi sveitarfélagi. Sveitarstjórnir setja nánari reglur um hlutverk og val í ungmennaráð.”

Tilgangur ungmennaráðs Ísafjarðarbæjar er að skapa vettvang og leiðir til þess að gera ungmennum kleift að koma hugmyndum og skoðunum sínum á framfæri m.a. við kjörna fulltrúa sveitarfélagsins auk þess að veita ungmennum fræðslu og þjálfun í lýðræðislegum vinnubrögðum.

Ungmennaráð starfar í umboði bæjarstjórnar í samræmi við samþykkt um stjórn Ísafjarðarbæjar og fundarsköp bæjarstjórnar.

2. gr.

Hlutverk

Hlutverk ungmennaráðs er að vera vettvangur ungmenna til að hafa áhrif á næsta umhverfi sitt. Sem dæmi um starfsemi ungmennaráðs má nefna:

- Ungmennaráð getur komið með ábendingar um öll málefni sveitarfélagsins.
- Ungmennaráð getur staðið fyrir og auglýst fundi og boðið til þeirra kjörnum fulltrúum, embættismönnum og/eða öðrum aðilum sem mál varðar hverju sinni.
- Ungmennaráð getur beitt sér fyrir bættri þjónustu við börn og ungt fólk.
- Ungmennaráð getur haft samráð við foreldrafélög framhalds-, grunn- og leikskóla um málefni barna og unglinga.
- Ungmennaráð getur staðið fyrir viðburðum.
- Ungmennaráð hefur upplýsingasíðu á heimasíðu Ísafjarðarbæjar og ber ábyrgð á að koma réttum upplýsingum á framfæri við tengilið Ísafjarðarbæjar.

Nefndir og ráð bæjarins skulu senda ungmennaráði til umsagnar öll málefni sem snerta ungt fólk sérstaklega og getur boðað fulltrúa ungmennaráðs til sín.

3. gr.

Tilnefning í ungmennaráð

Í ungmennaráði skulu sitja 9 fulltrúar tilnefndir af eftirtöldum aðilum: nemendum grunnskóla sveitarfélagsins, nemendum Menntaskólans á Ísafirði og ungmennum utan skóla.

Tilnefnt skal árlega og skulu berast bæjarráði fyrir 1. október ár hvert. Í samræmi við jafnréttislög nr. 10/2008 skal hlutfall kynjanna vera sem jafnast. Ungmenna ráð kýs sér formann og varaformann.

**4. gr.
Fundir**

Ungmennaráð skal funda a.m.k. þrisvar sinnum á ári. Fulltrúar í ungmennaráði fá ekki greitt fyrir fundarsetu. Formaður ungmennaráðs boðar til funda, ákveður dagskrá í samráði við sviðsstjóra íþróttá- og tómstundasviðs og stýrir fundum ráðsins.

**5. gr.
Þjónusta Ísafjarðarbæjar við ungmennaráð**

Til að greiða fyrir starfsemi ungmennaráðs beinir Ísafjarðarbær þeim tilmælum til stofnana bæjarins að þær veiti ungmennaráði aðstöðu til fundahalds án endurgjalds. Íþróttá- og tómstundanefnd ákveður ár hvert fjárframlag til ungmennaráðs sem ætlað er til að greiða t.d. pappír, póstburðargjöld, veitingar og fleira samanber hlutverk þess.

Umsjónamenn félagsmiðstöðva og sviðstjóri skóla- og tómstundasviðs aðstoða ungmennaráð við upplýsingaöflun úr stjórnsýslunni ásamt því að birta fundargerðir ráðsins á vefnum. Íþróttá- og tómstundanefnd hefur fræðsluskyldu gagnvart fulltrúum í ungmennaráði.

Fundargerðir ungmennaráðs eru birtar á vef Ísafjarðarbæjar. Fundargerðirnar eru teknar til kynningar á fundum bæjarstjórnar og íþróttá- og tómstundanefndar.

**6. gr.
Samskipti**

Íþróttá- og tómstundanefnd og sviðsstjóri skóla- og tómstundasviðs eru tengiliðir ungmennaráðs við sveitarfélagið.

Einu sinni á ári boðar bæjarstjórn ungmennaráð til fundar þar sem ungmennaráð getur komið sínum áherslum á framfæri.

Einu sinni á ári boðar íþróttá- og tómstundanefnd ungmennaráð til fundar þar sem farið er yfir störf þess, hlutverk þeirra og framtíðarsýn.

Ungmennaráð kemur erindum sínum á framfæri við bæjarstjórn eða stjórnsýslu bæjarins með formlegum hætti, þ.e. með bréfi eða tölvupósti. Ísafjarðarbæ ber að svara erindum með bréfi eða tölvupósti.

Samþykkt í bæjarstjórn Ísafjarðarbæjar 1. júní 2017